

**Qeveria zvicerane vazhdon mbështetjen për komunat e Kosovës juglindore**

# **LOGOS-i i alokon 81 mijë euro për 9 komuna**



GJILAN, 2 NËNTOR (KD) - Projekti Zvicër - Kosovë për qeverisje lokale dhe decentralizim - LOGOS, që zbatohet nga fondacioni "Helvetas - Intercooperation" dhe financohet nga Qeveria zvicerane, té mërkurën, në Gjilan, e ka nënshkruar marrëveshjen e financimit të 9 projekteve për barazi gjinore dhe ka prezantuar 9 projekte për mbështetje të zyrave të informimit publik të 9 komunave të Kosovës juglindore (Kamenicë, Novobërdë, Ranillug, Partesh, Kllokot, Viti, Kaçanik, Hani i Elezit dhe Shtërpçë).

Në kuadër të marrëveshjeve të financimit për projektet e barazisë gjinore LOGOS-i për komunat partnere të Kosovës juglindore i ka alokuar 63 mijë euro, ndërsa secila ka përfituar nga një grant prej 7 mijë eurosh. Kurse për projekte për mbështetje të zyrave të informimit publik janë alokuar 18 mijë euro, nga 2 mijë euro për secilën komunë. Projektet që kanë té bëjnë me barazinë gjinore do të zbatohen nga zyrat komunale té

barazisë gjinore dhe OJQ-të lokale, kurse projektet për mbështetje të zyrave të informimit publik do të zbatohen nga vetë këto zyra. Koordinatori i projektit LOGOS, Norbert Piljs, ka thënë se Qeveria zvicerane është e interesuar që fonde e saj t'i shpenzojë për zhvillimin e demokracisë lokale dhe në këtë drejtim LOGOS-i mbështet projektet që kanë té bëjnë me avancimin e punës së zyrave për informim publik dhe zyrat për barazi gjinore. "Avancimi i punës së zyrave për informim dhe i atyre për barazi gjinore është me rëndësi pér LOGOS-in, ndërsa këto zyra dhe OJQ-të që mbështeten me këto fonde do t'i shpenzojnë mjetet aty ku e shohin më té arsyeshme dhe ku nevojat janë më té mëdha", ka thënë Piljs. Ndërkëq Merita Barileva, zyrtare për projektet e LOGOS-it, ka thënë se LOGOS-i përvëç mbështetjes që është duke u dhënë komunave partnere të Kosovës juglindore në projekte investuese, planifikim té buxhetit, planifikim strategjik, menaxhim

të mbeturinave, té hyrave vetjake dhe në fusha tjera, një vëmendje të veçantë i ka kushtuar edhe barazisë gjinore dhe për këtë qëllim janë alokuar 63 mijë euro. Zyrtari tjetër i LOGOS-it, Pascal Fendrich, ka thënë se përmes fondeve të dedikuara për zyrat e informimit publik do të mbështeten aktivitetet e këtyre zyrave të planifikuara në planet e punës dhe që janë në interes të informimit të qytetarëve për zhvillimet në komuna. Ibadete Hyseni, zyrtare për barazi gjinore në Viti, ka thënë se përmes fondeit nga projekti LOGOS, Zyra për barazi gjinore në Viti do të zbatojë projektin që ka té bëjë me promovimin e Ligjit për barazi gjinore dhe iniciimin e procesit të zbatimit té perspektivës gjinore përmes politikave buxhetore té komunës. Kurse Bashkim Sopa, zyrtar për informim publik i Komunës së Hanit té Elezit, ka thënë se përmes mbështetjes që u ka dhënë projekti LOGOS zyrate të informimit publik do të fuqizohet puna e tyre.